

4 cedera, bas rombongan pelajar kemalangan di LPT2

KEMAMAN 15 Nov. - Tiga pelajar Sekolah Menengah Islam Hira' Jeram, Kuala Selangor dan seorang pemandu cedera apabila bas yang dinaiki terlibat dalam kemalangan di Kilometer 292.2, Lebuh Raya Pantai Timur 2 (LPT2) berdekatan Hentian Rehat Kijal, pagi ini.

Dalam kejadian kira-kira pukul 2.15 pagi itu, bas persiaran dua tingkat berkenaan dikatakan dalam perjalanan ke Kuala Terengganu untuk lawatan sambil belajar ke Universiti Sultan Zainal Abidin (UniSZA).

Sebanyak 51 lagi pelajar dan tujuh guru pengiring yang berada di dalam bas tersebut tidak mengalami sebarang kecederaan.

Ketua Polis daerah, Superintendent Mohd. Said Ibrahim berkata, siasatan awal pihaknya mendapati bas itu merempuh belakang sebuah treler yang sarat dengan muatan kayu.

Justeru, beliau tidak menolak kemungkinan bas tersebut dipandu laju sehingga pemandunya tidak menyedari kehadiran lori di hadapannya.

"Kejadian berlaku di laluan lurus dan keadaan pada masa itu tidak hujan. Bas terbabit merempuh belakang lori yang berada di laluan kiri lebuh raya," katanya di sini hari ini.



AZMAN YAHYA dirawat di Hospital Kemaman.

Menurut Mohd. Said, akibat rempuhan itu, pemandu bas, Azman Yahya, 41, tersepit di tempat duduk pemandu manakala tiga lagi pelajar mengalami kecederaan kerana tercampak.

"Seorang pelajar mengalami kecederaan parah manakala dua lagi rakananya mengalami kecederaan ringan. Kita percaya pelajar yang parah itu duduk di barisan hadapan sebelah pemandu bas tersebut," katanya.

Mohd. Said berkata, anggota bomba Kerteh dan Paka yang menerima panggilan pada pukul 2.25 pagi tiba ke tempat kejadian bersama 16 anggota berjaya mengeluarkan pemandu bas yang tersepit setengah jam kemudian.

KEADAAN bas persiaran yang membawa pelajar Sekolah Menengah Islam Hira' Jeram, Kuala Selangor selepas terbabit kemalangan di Kilometer 292.2 LPT2 berdekatan Hentian Rehat Kijal, Kemaman, semalam.

